


■ IMPULS DALL'EMDA

Tgi che ristga gudogna!

DAD ANITA SIMEON

«Cura che nus eran anc giuvens era quai tut auter!» Quest zitat han bain blers senti da lur tats ed ils tats da lur tats ed uschia vinavant. Las midadas vegnan però adina pli spertas. La tema dal nov sesa en l'ossa, pertge betg mintga novaziun è er ina meglieraziun! Mantener quai ch'ins ha, salvar las tradiziuns – quai e la devisa. Quai vala er per il rumantsch e per ses moviment, en Surmir, en Engiadina, en Surselva sco era a Cuira. E quai ha fors'er da far cun il curius sentiment da responsabladad envers ils tats e las tattas che discurrivan già questa lingua... Stai si defenda! Igl è in masditg tranter malencurada, tradiziun, cumbat e folclorissem – il tudestg pia il linguatg dal pan ed il rumantsch il linguatg dal cor.

Pils giuvens vesa quai or in zichel auter. Il linguatg dal cor duvrain nus



Anita Simeon è chauredactura da la gasetta dals giuvens «Punts».

MAD

betg. Il rumantsch porscha a nus però diversas schanzas. Schanzas d'emprender insatge nov, quai che fiss fors'en ina altra communitad linguistica betg uschia simpel. A nus giuvens Rumantschs sa derv'in grond spazzi d'experimental e da rimnar experienschas persunalas e quai è il davos il Red Bull pil rumantsch. Ma betg mo la giuventetgna po e sto prender questa chaschun, er ils pli vegls pudessan profitar. La retegnientscha faussa da dir «Quai poss jau mo far perquai che jau sun Rumantsch u Rumantscha, en la regiun tudestga avess jau nagina schanza» è tupa e na correspunda er betg a la realitad. Professionalitad san ins pir ragiun-scher cun experimental e rimnar experienschas e quellas èn er dumandadas en intschess tudestg. Il bonus d'exotissem rumantsch po bain a l'entschatta esser in agid, ma quel bonus è spert sblatgi.

Mintgtant am para ch'il moviment rumantsch saja memia instituzionalisà, pauc spontan e decisiuns dovrin ina massa temp – scu tgi tutga per decisiuns democraticas. Savens ha la democrazia però er aspects negativs, retardants – e quels na po la Rumantschia betg pli sa lubir.

Ella sto esser innovativa, ristgar mintagant insatge e betg dumandar Ponzius e Pilatus sche quella u tschella idea u novaziun saja giustifitgada e giavischibla e sch'ella na vegn per blers betg en consideraziun alura na vegn ella er betg manada tras. Igl è gist, che betg mintga novaziun sto stringentamain er esser ina meglieraziun, ella porta però la schanza da meglierar insatge. Sch'ins fa valair questa schanza u betg dependa il davos dad in e scadin da nus. Mo quel che ristga, gudogna, pertge l'auter sa betg gudignar insatge, el sa mo mantener.